



EFE

Antonio Diaz Miguel gaur ehortziko dute. Herenegun gauean hil zen Antonio Diaz Miguel, Espainiako hautatzaile ohia eta Europako entrenatzaile onenetarikoa izandakoa. Gaur ehortziko dute.



WILLIAM WEST / AFP

'Black Magic' aurretik Amerika Kopan. Zeelanda Berriko *Black Magic* bela-ontzia Amerika Kopa irabazteko bidean da. Bigarren estropadan ere Italiako *Prada*-ren aurretik sailkatu zen, bi minutuko aldeaz.



DOUGLAS ENGLE / AP

Ronaldo pozik, erreabilitazioa hasita. Ordu erdiko korrikaldiak eta bestelako ariketak egiten hasi da Ronaldo Rio de Janeiron. Animoso agertu da futbolaria, apirilean berriro jokatzeko itxaropenez.

Futbola ♦ Ravellirekin berdindua dago

Matthaus, beste errekor bat haustear

*Gaur jokatzen badu, bere 144.
partidua izango du Alemaniarekin*

Agentziak / Amsterdam

BESTE marka bat ontzear da Lotthar Matthaus jokalaria alemaniarra. Izan ere, gaur Holanda-Alemanien arteko lagunarteko partiduan jokatzen baldin badu, bere 144. neurketa izango du Alemaniako selekzioarekin. Gaur egun Thomas Ravelli Suediako atezainarekin dago berdinduta arlo horretan Matthaus, 143 partidurekin. Ravelli orain dela bi urte eta erdi erretiratu zen. Hirugarren, berriz, Majed Abdula Saudiar arabiarra dago, 140ekin (1978tik 1994a arte aritu zen hura).

Matthaus da bost mundialetan parte hartu duen jokalaria bakarra, eta bere selekzioarekin 1980an egin zuen debuta, Italian, Europako Txapelketan. 19 urte zituen orduan, eta 17 minututan jokatzen zuen. Gainera, gaurko kontrario bera izan zuen orduan: Holanda. 22 gol sartu ditu 143 partidutan.

38 urte ditu Matthausek, eta izugarria da bere palmaresa: bost aldiz izan da Alemaniako Ligako txapeldun Bayern Munichekin (1985, 1987, 1994, 1997 eta 1999-an), bi aldiz Alemaniako Kopakoa Bayern Munichekin (1986 eta 1998an), munduko txapeldun behin Alemaniako selekzioarekin (1990ean), Europako txapeldun beste behin Alemaniarekin (1980an), UEFAko txapelketa bat du Inter Milanekin (1991n) eta beste bat Bayern Munichekin (1996an)... Taldekako Europako Txapelketa bat

irabaztea falta zaio batik bat, eta iaz gertu egon zen, Bartzelonan, Bayern Munichekin, partidua bukaeran sartu zituelako Manchester Unitedek garaipena eman zioten bi golak. «Hura da nire oroitzapenik garrantziena», esan izan du Matthausek.

Gaur baliteke titular izatea, eta, beti bezala, serio hartuko du partidua, lagunartekoa den arren.

hitz bitan

Erditik libero postura: Gaztetan erdilaria jokatzen zuen Matthausek. Indar handiko mutila zen, eta azkarra. Urteak aurrera joan ahala, ahitzen joan zaizkio dohainak, eta libero aritu da azken hamar bat urteetan.

laburrean

F U T B O L A

■ **Paul Gascoigne fitxatu nahi dute Australian**
MARCONI STALLIONS taldeak Paul Gascoigne jokalaria ingelesa fitxatu nahi du datorren denboraldian. Middlesbrough taldean ari da Gascoigne, eta lesionatuta dago, aurkari bati ukalondokoa ematean besoko hezur bat hautsi baitzuen. Australiako talderik ezagunena da Marconi Stallions, eta klubeko presidente Eddie Krncevick uste du Gascoigne konbentzitutako dutela Australiara joan dadin: «Arrantzarako leku egokia topatuko diogu, eta horrek lagunduko dio erabakia hartzen». Middlesbroughen bi denboraldi daramatza Gascoigne, eta 43 partidua besterik ez ditu jokatuta.

■ **Ipuruako berrikuntza lanak azken txanpan dira**
EIBAR-EN asteon abiatu dute Ipurua futbol zelaia egokitze-lanen azken saioa. Tribuna txiki bat eraikiko dute Ipuruan, eta zelaia berri eta drenajea aldatuko dute. Berrikuntza lanek hiru hilabete iraungo dute, 100 milioi pezeta kostako dira, eta Ipuruan 4.400 ikusle beharrean 5.200 sartuko dira. Eibarko Udalak eta Gipuzkoako Foru Aldundiak jarriko dute berrikuntza lanetarako dirua.

S A S K I B A L O I A

■ **New York Knicks Atlantic Divisioneko lider jarri da NBA, Miami Heatek Detroiten eginiko hutsa baliatuta**
NEW YORK KNICKS taldeak 87-76 irabazi zion Los Angeles Clippersi, eta Atlantic Divisioneko lider jarri da berriro. Allan Houston (24 puntu), Pat Ewing (15 puntu eta 12 errebote) eta Latrell Sprewell (16 puntu, 9 asistentzia eta 7 baloi lapurtze) erabakigarriak izan ziren New Yorken garaipenerako. Miami Heatek, berriz, 95-87 galdu zuen Detroit Pistonsen aurka, eta dagoeneko ez da bere multzoko lidera. Beste emaitzak: Indiana 94, Dallas 93; Cleveland 109, Vancouver 108; San Antonio 89, Phoenix 98; Denver 123, Sacramento 117; Utah 96, Atlanta 94; Portland 105, Boston 92.

■ **Espainia, Frantzia, Italia eta Greziak komunitario ez diren bi jokalaria izaten jarraituko dute hurrengo denboraldian**
EUROPAKO BATASUNETIK kanpoko bi jokalaria izaten jarraituko dutela erabaki zuten Espainiako, Frantziako, Italiako eta Greziako Federazioek, atzo Erroman eginiko bileran.

O L I N P I S M O A

■ **Nahiko babes ziurtatu arte ez dela NBOKo presidente izateko aurkeztuko esan du Kevan Gosperrek**
NAZIOARTEKO BATZORDE OLINPIKOKO presidenteorde Kevan Gosper kanadarra da Jose Antonio Samaranchen lekua betetzeko hautagai seguruenak. Gosperrek, baina, nahiko babes izango duela ziurtatu arte ez dela NBOKo lehendakartzara aurkeztuko esan zuen atzo: «Badakit jende baten babesa badudala, baina oraindik ez dut erabaki aurkeztuko naizen. Beharrezko babesa lortutakoan egingo dut hori, egokiera ona dela iruditzen zaidanean».

Tau Baskonia ♦

Morales hiru aste barru jokatze ko prest egongo da atzo ebakuntza egin ondoren

Jon Rejado / Gasteiz

JUANAN MORALES hiru aste barru —gehienez— jokatze prest egongo da atzo egin zioten ebakuntza ondo atera ondoren. Santiago Rodriguez Camarero doktoreak egindako ebakuntza «arrakastatsua» izan zela adierazi zuen Jesus Secok, Tau Baskoniaren sendagileak, operazioaren nondik norakoak jakinarazteko egin prentsaurrekoan.

Juanan Morales oinez ateratzen erietxetik, inolako laguntzarik gabe, eskuin hankan soilik benda bat zuela. Datorren asteazkenean hasiko da berriz sasoian jartzeko ariketak egiten Tauro pibota, igerilekuan eta giharrek sendotzen.

Ordu bat iraun zuen ebakuntzak, eta teknika berriak erabiliz egin zuen Camarero doktoreak. Berrikuntza hori Moralesek minduta zuen zaina kentzeko egindako ebakuntza dago.

Mindutako zaina ateratzeko izter ondoan eta orkatilan ebakuntzak egin beharrean (orain arte bezala), Baskoniako pibotari zortzi ebaki txiki egin zizkioten lesioa sendatzeko. Morales esna egon zen ebakuntza egiten zioten bitartean.

Ebakuntza berritzaile honi esker, hiru aste barru prest egongo da Morales; normalean egiten den ebakuntzarekin, berriz, gaixoak gutxienez hilabete bat behar du guztiz sendatu arte.